

Qalam

Bilangan 68 Rejab 1357 – Mac 1956 60 Sen

MERDEKA OGOS 1957

Tengku Abdul Rahman sekembalinya dari England telah mengisytiharkan di Melaka bahawa pada 31 Ogos 1957 Malaya akan menjadi sebuah negara merdeka di dalam lingkungan Commonwealth British. Perkara-perkara yang mengenai hal ehwal dalam negara adalah dikawal dan dijaga oleh kerajaan Persekutuan dan hal ehwal luar negara akan dikawal oleh kerajaan British. Dengan ini berertilah bahawa kerajaan Persekutuan Tanah Melayu itu akan berdiri di atas kakinya sendiri – tidak lagi bergantung kepada orang lain. Segala-galanya yang baik atau yang buruknya akan menjadi bebanan pemerintahan Persekutuan Tanah Melayu yang didokong oleh rakyat. Dokongan yang besar sekali sebagaimana yang diterima oleh Tengku sebagai akuannya ialah menghapuskan Komunis di negeri ini.

Sebelum kita memberi pandangan yang tepat di atas perkara yang mengenai kemerdekaan itu moleklah kita mengkaji gerak langkah yang menjadikan kerajaan British bersetuju memberikan kemerdekaan kepada Malaya. Kita melihat bahawa telah menjadi beban yang besar bagi kerajaan British di Malaya ialah menghapuskan keganasan Komunis. Beberapa banyak nyawa dan beberapa banyak harta benda yang telah habis untuk menjalankan usaha itu. Dalam masa Dato' Onn mengetuai UMNO, kerajaan British,

melihat kepada keadaan-keadaan pada masa itu, telah dapat menggunakan UMNO (di bawah Dato' Onn) mengadakan pasukan-pasukan sukarela (Home Guard dan seumpamanya) untuk mengawal Malaya.

Setelah langkah-langkah Dato' Onn tidak berjaya dan setelah orang-orang Melayu melihat bahawa Dato' Onn bertujuan hendak me-Malayan-kan umat Melayu dengan adanya cita-cita menyatukan bangsa-bangsa di Malaya maka setelah berubah pucuk pimpinan UMNO kepada Tengku Abdul Rahman – rakyat mengharap ia akan memimpin umat Melayu kepada tujuan asalnya – dan dengan sokongan-sokongan yang penuh dari rakyat maka tertubuhlah kerajaan Perikatan yang dikatakan didokong oleh rakyat itu.

Melihat kepada adanya rakyat berdiri dibelakangnya dan melihat pula kepada gerak-gerak yang ada di luar UMNO dengan mendirikan satu semboyan “satu bangsa satu bahasa dan satu negara yang merasmikan Melayu sebagai suatu corak kebangsaan, untuk menyelenggarakan kemahuan rakyat maka kerajaan British lalu memberikan kemerdekaan itu dengan suatu syarat bahawa ia meluluskan kemerdekaan itu dengan akuan Malaya akan bekerjasama melawan Komunis dan membenarkan pasukan RADA di Malaya sehingga kepada suatu masa yang ditentukannya. Ia terpaksa memberikan yang demikian kerana jika ditahan sudah barang tentu akan menimbulkan perbalahan-perbalahan yang hebat di antara kerajaan British dengan rakyat yang mendatangkan tuntutan itu.

Tetapi apakah yang sebenarnya hakikat merdeka yang di dapat oleh Tengku itu? Jawabnya suatu bebanan yang berat kepada Malaya dengan penduduknya. Pengorbanan yang besar mesti ada tetapi apakah pengorbanan itu akan membawa keuntungan dan faedah kepada bangsa Melayu? Inilah soalnya yang patut dan sama-sama kita fikirkan.

Semenjak daripada dahulu lagi cita-cita meMalayankan itu berjalan. Dengan mengakui Malayan, bermakna orang-orang

Melayu telah mengakui yang diri mereka bukan lagi sebagai satu kebangsaan tetapi telah mengakui yang mereka sebagai suatu kaum yang termasuk di dalam bangsa Malayan. Dengan corak Malayan yang dikehendaki atau yang ditetapkan itu nanti sebagai riak-riaknya yang masih samar-samar maka di dalam kemerdekaan yang dikehendaki itu orang-orang Melayu akan menghadapi beberapa perkara yang mereka tidak mempunyai kemampuan mengisi kemerdekaan itu di dalam persaingannya dengan orang-orang yang berasal daripada bangsa lain.

Jawatan-jawatan tadbir kelak akan banyak terletak di dalam tangan mereka. Lihat sahaja di dalam seratus penuntut-penuntut di Universiti Malaya hanya 10 orang-orang kita. Di dalam ekonomi tidak payah disebut lagi – padahal inilah dia isi-isi yang mustahak ada di dalam sebuah negara yang merdeka.

Kita bentangkan perkara-perkara yang tersebut ini adalah untuk perhatian supaya dalam masa kita bersukacita menyebut berita-berita merdeka itu maka dalam masa itu pula kita mesti fikirkan adakah kemerdekaan itu untuk kita atau merugikan kita. Menyambut dengan gembira satu-satu berita merdeka itu ialah seperkara yang mudah tetapi memikirkan dan mengisi kemerdekaan yang didapat itu bukanlah ia satu perkara yang mudah dan senang. Pengorbanan, susah payah dan penderitaan mesti ada tetapi di sebalik itu janganlah pula dijadikan sesuatu sebab nanti untuk jadi alasan semata-mata tatkala rakyat menderita. Bersiap sedialah bagi orang-orang yang bersefahaman di atas kemerdekaan secara itu untuk menghadapi masa yang akan datang. Tentukanlah apakah corak bangsanya kelak sebelum menjadi tempelak umum bangsa Melayu yang berdiri di belakang kita. Dengan hasrat yang demikian inilah sahaja kita menghadapi tarikh 31 Ogos 1957 nanti yang patut diperhatikan lain daripada beberapa masalah yang bakal timbul kelak!

KERJASAMA AGAMA

Terbit daripada kesudahan pilihanraya di Indonesia yang memberi keputusan bahawa kemenangan parti-parti Islam tidak sebagaimana yang diharap maka orang-orang di pedalaman (orang-orang yang mengadakan perlawanan terhadap kerajaan sementara Indonesia sekarang) memandang bahawa yang demikian terjadi tidak lain kerana kerajaan Indonesia membiarkan Komunis berleluasa membuat dakyah di seluruh Indonesia (terutamanya di Jawa Tengah, yang di dalamnya banyak buta huruf). Perbuatan ini dengan sendirinya telah meletakkan Komunis menjadi kuasa yang keempat di Indonesia.

Dengan tidak ada niat menyertai langkah-langkah orang-orang Islam yang melawan dengan bersenjata di Indonesia yang bercita-cita hendak menegakkan negara Islam di sana seperti yang dijalankan oleh Kartosoewirjo di Jawa Barat, Daud Beureu'eh, Kahar Muzakkar di Sulawesi dan Ibn Hajar di Kalimantan, kita berpendapat bahawa “kekalahan” umat Islam Indonesia dalam pemilihan umum – dan langkah-langkah tergamaknya Nahdlatul Ulama bekerjasama dengan Komunis kerana merebut kedudukan itu adalah menjadi apa yang dikehendaki oleh mereka, yang dengannya mereka harus, jika Islam menang, akan memberhentikan perlawanan bersenjata mereka untuk menegakkan sebuah negara Islam di Indonesia. Mereka mengerti di dalam keadaan sekarang, sebuah kerajaan Islam yang diperjuangkan di dalam perlembagaan tidak akan berhasil sebelum suatu langkah yang tegas untuk menghapuskan Komunis, bukan sahaja di dunia, tetapi di negeri-negeri yang beragama dijalankan bersama-sama dengan berganding tangan yang rapat di antara badan agama-agama itu dengan melupakan perkara-perkara perselisihan mereka yang telah lalu.